



CARNAVAL TA DRENTANDO ARUBA



Durante ultimo fin di sima e ambiente di Carnaval por a worde sinti den varios club di Aruba.

Diadomingo tabatin den Commandeursbaaclub eleccion di Prins Carnaval cu un fiesta marathón, cual a worde amenizá door di casi tur orquesta di Aruba.

Diasabra anochi Aruba Tivoli Club a escohé srta. Lilia Heronimo como nan reina. Otro siman coronacion lo tuma lugar.

Otro reina a sali diasabra anochi, esta esun di Juventud Cristian durante un fiesta na Hotel Strand.

Cu amplia margen e bella srta. Ella Yarzagaray a superá tur su rivalnan.

Den otro clubnan ainda e lucha ta sigui y diasabra awor lo sali varios reina mas.

Y COMENTARIO

Diadomingo tabatin den Commandeursbaaclub eleccion di Prins Carnaval di Aruba pa e anja aki.

Contrario na anjanan anterior e jurado, cu mester a scohe e Prins, a worde nombrá di tal manera cu tur posibilidad pa influenciá e miembronan di jurado a worde eliminá.

Algun miembro di e Comité Central di Carnaval a scohe cada un, un persona pa participá den e jurado, siendo cu e nombrenan di e personanan den e jurado a keda secreto, tanto pa e comité mes como pa e otro miembronan di e jurado.

Esaki ta un acto cu mester haya su merito, pasobra di e manera aki e actual Comité Central a demostrá cu nan ta haci tur nan posibel pa evitá dificultadnan cu a surgi durante anjanan anterior. E cinco candidatonan pa Prins, hunto cu nan Pancho, a presentá y finalmente e jurado a eligi cu un mayoría abrumadora Prins Chupabebe y Pancho Fofó (Richard Salas y Armando Villasmil), representantenan di Aruba Tivoli Club.

E cinco candidatonan mester a cumpli cu tres requisito, esta personalidad, un cierto grado di educacion general y naturalmente nan calidadnan riba terreno humorístico.

Esun cu a cumpli mehor cu e tres requisitonan aki tabata sin duda algun Richard Salas cu Armando Villasmil. Durante nan presentacion, cu por cierto tabata di alta calidad, e publico a keda hopi entusiasmo, pero ora a worde anunciá cu ta nan a sali Prins y Pancho di Aruba, un grupo for di den e mes publico ey, a demostrá nan desaprobacion cu e eleccion aki.

Nos ta considerá esaki un acto inhusto pa cu e Prins, pa cu e jurado, pa cu e Comité Central, y si e grupo ey ta pertenecé na cierto distrito di Aruba of na cierto club, anto e ta tambe un acto inhusto pa cu e distrito ey of e club ey, pasobra nan ta demostrá cu nan no por aceptá un derrota como caballero.

Algun otro persona a demostrá nan desaprobacion cu e Prins aki, pasobra e ta un hende, cu no a nace na Aruba. Esaki ta otro actitud cu nos mester criticá fuertemente. Carnaval ta algo pa tur hende bibá na Aruba. Nos corda simplemente cu tur anja e gruponan tranhero ta mehor, un jurado no tin otro alternativa cu scohe nan.

E fiesta mes na Commandeursbaaclub tabata generalmente un éxito.

Un maestro di ceremonia excelente, den persona di Janchi Tromp, mayoría di e orquestanan di Aruba a duna cooperacion animador y gratuitamente y.... pueblo di Aruba tambe a duna cooperacion, acudiendo den gran cantidad.

Y asina nos ta mira, cu si tur hende coopera plenamente, Carnaval mester bira un éxito